

古今刀劍錄 銅劍讚
車銃圖 蟻衣生劍記



Z121

1

21490

60536

古今刀劍錄

陶弘景撰

中華書局

叢書集成初編

古今刀劍錄（及其他三種）

中華書局出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之二

統一書號：ISBN7—101—00894—1/K·367

叢書集成初編所選
百川學海漢魏叢書
龍威秘書皆收有此
書百川宋本故據以
排印並附漢魏本王
謨跋於後

古今刀劍錄

并序

梁 華陽道士陶弘景撰

夫刀劍之由出已久矣。前王後帝莫不鑄之。但以小事記注者不甚詳錄。遂使精奇挺異。空成墮沒。慨然有想。遂爲記云。

夏禹子帝啓。在位十年。以庚戌八年鑄一銅劍。長三尺九寸。後藏之秦望山。腹上刻二十八宿文。有背面文。爲星辰。背記山川日月。

啓子太康。在位二十九年。歲在辛卯三月春。鑄一銅劍。上有八方。面長三尺二寸。頭方。

孔甲。在位三十一年。以九年歲次甲辰。採牛首山鐵鑄一劍。銘曰夾。古文篆書。長四尺一寸。

殷太甲。在位三十二年。以四年歲次甲子。鑄一劍。長二尺。文曰定光。古文篆書。

武丁。在位五十九年。以元年歲次戊午。鑄一劍。長三尺。銘曰照膽。古文篆書。

周昭王瑕。在位五十一年。以二年歲次壬午。鑄五劍。各投五嶽。銘曰鎮嶽尙方。古文篆書。長五尺。

簡王夷。在位十四年。以元年歲次癸酉。鑄一劍。長三尺。銘曰駿。大篆書。

秦昭王稷。在位五十二年。以元年歲次丙午。鑄一劍。長三尺。銘曰誠。大篆書。

秦始皇。在位三十七年。以三年歲次丁巳。採北祗銅鑄二劍。銘曰定秦。小篆書。李斯刻。埋在阿房宮閣下。

一在觀臺下長三尺六寸。

前漢劉季在位十二年以始皇三十四年於南山得一鐵劍長三尺銘曰赤霄大篆書及貴常服之此卽斬蛇劍也。

文帝恆在位二十三年以初元十六年歲次庚午鑄三劍長三尺六寸銘曰神龜多刻龜形以應大橫之兆帝崩命入玄武宮。

武帝徵在位五十四年以元光五年歲次乙巳鑄八劍長三尺六寸銘曰八服小篆書嵩恆霍華太山五嶽皆埋之。

宣帝詢在位二十五年以本始四年鑄二劍長三尺一曰毛二曰貴以足下有毛故爲之皆小篆。

平帝衍在位五年以元始元年歲次辛酉掘得一劍上有帝名因服之大篆書。

王莽在僞位十七年以建國五年歲次庚午造威斗及神劍皆練五色石爲之銘曰神勝萬里伏小篆書長三尺六寸。

更始劉聖公在僞位二年自造一劍銘曰更國小篆書。

後漢光武秀在位三十三年未貴時在南陽鄂山得一劍文曰秀霸小篆書帝常服之。

明帝莊在位十八年以永平元年歲次戊午鑄一劍上作龍形沉之於洛水中水清時常有見之者。

章帝炆在位十三年以建初八年鑄一金劍令投於伊水中以厭人膝之恠弘景按水經云伊水有一物。

如人膝。頭有爪。人浴輒沒不復出。

安帝祐。在位十九年。以元初六年鑄一劍。藏峨眉山。疑山王也。

順帝保。在位十九年。以永建元年鑄一劍。長三尺四寸。銘曰安漢。小篆書。後改年號。

靈帝宏。在位二十二年。以建寧三年鑄四劍。文曰中興。一劍無故自失。並小篆書。

魏武帝曹操。以建安二十年於幽谷得一劍。長三尺六寸。上有金字。銘曰孟德。王常服之。

齊王芳。以正始六年鑄一劍。常服之。無故自失。但有空匣如故。後有禪代之事。兆始於此。尋爲司馬氏所廢。

蜀主劉備。以章武元年歲次辛丑採金牛山鐵鑄八劍。各長三尺六寸。一備自服。一與太子禪。一與梁王理。一與魯王永。一與諸葛亮。一與關羽。一與張飛。一與趙雲。並是亮書。皆作風角處。所有令稱元造。刀五萬口。皆連環。及刃口列七十二鍊。柄中通之。兼有二字。房子容曰。唐人尙書郎李章武。本名方古。貞元季年。爲東平帥。李師古判官。因理第掘得一劍。上有章武字。方古博物。亞張茂先。亦曰。蜀相諸葛孔明所佩劍也。乃改名師古爲奏。請爲章武焉。蓋蜀主八劍之一也。

後主禪。延熙二年造一大劍。長一丈二尺。鎮劍口山。往往人見光輝。後人求之不獲。

吳王孫權。以黃武五年採武昌銅鐵作千口劍。萬口刀。各長三尺九寸。刀頭方。皆是南銅越炭作之。文曰大吳。小篆書。又赤烏年中。有人得淮陰侯韓信劍。帝以賜周瑜。

孫亮以建興二年鑄一劍。文曰流光。小篆書。

孫皓以建衡元年鑄一劍。文曰皇帝吳王。小篆書。

晉武帝司馬炎以咸寧元年造八千口刀。銘曰司馬。

懷帝熾以永嘉元年造一劍。長五尺。銘曰步光。小篆書。

成帝衍以咸和元年造十三口刀。銘曰興國。

穆帝聃以永和五年於房山造五口劍。銘曰五方單符。隸書。

孝武帝昌明以大元元年於華山頂埋一劍。銘曰神劍。隸書。

宋武帝劉裕以永初元年鑄一刀。銘其背曰定國。小篆書。長四尺。後入於梁。

少帝義符以景平元年造一刀。銘曰五色。小篆書。

後廢帝昱以元徽二年於蔣山頂造一劍。銘曰永昌。篆書。

順帝準以昇明元年掘得一刀。銘曰上血。其刀照一室。帝奇之。至二年七月。帝使楊玉候織女。玉候女不

得。懼死。用以弑帝。果如銘。故知吉凶其徵先見矣。

齊高帝蕭道成以建元二年造一刀。銘曰定業。長五尺。篆書。自制之。

明帝鸞以建武二年造一刀。銘曰朝儀。長四尺。小篆書。

梁武帝蕭衍以天監二年卽位。至普通中。歲在庚子。命弘景造神劍十三口。用金銀銅錫鐵五色合爲之。

長短各依劍術法。文曰服之者永治四方。並小篆書。

諸小國刀劍摠在此

前趙劉淵以元熙二年造一刀。長三尺九寸。文曰滅賊。隸書。

後趙石勒以建平元年造一刀。用五百金。工用萬人。頭尖。長三尺六寸。銘曰建平。隸書。勒未貴時。耕地得

一刀。銘曰石氏昌。篆書。

石季龍以建武十四年造一刀。長五尺。銘曰皇帝石氏。隸書。

後蜀李雄以晏平元年造刀五百口。文曰騰馬。隸書。

前涼張寶造刀百口。無故刀盡失。文曰霸。

後魏昭成帝拓跋健以建國元年於赤治城鑄刺刀十口。金鏤赤冶字。

道武帝珪以登國元年於嵩阿鑄劍一劍。銘曰鎮山。隸書。

明元帝嗣以泰常元年造劍一劍。長四尺。銘背曰太常。至真君元年。有道士繼天師白爲帝造劍。長三尺六

寸。隸書。因改元真君。

宣武帝恪以景明元年於白鹿山造一刀。文曰白鹿。隸書。

前秦苻堅以甘露四年造一刀。用五千工。銘曰神術。隸書。

前燕慕容皝以元璽元年造二十八口刀。銘曰二十八將。隸書。

後燕慕容垂以建興元年造二刀長七尺一雄一雌隸書若別處之則鳴

後秦姚萇以建初元年造一刀銘曰中山長三尺七寸隸書

西秦乞伏國仁以建義三年造一刀銘曰建義隸書

後涼呂光以麟嘉元年造一刀銘背曰麟嘉長三尺六寸

南涼禿髮烏孤以太初三年造一刀狹小長二尺五寸青色匠人曰當作之時夢見一人被朱服云吾是

太一神來看汝作云此刀有獻必鳴後落突厥可汗所有也

南燕慕容玄明以建平元年作刀四口文曰建平隸書

西涼李暠以永建元年造珠碧刀一口銘曰百勝隸書

北涼沮渠蒙遜以永安三年造刀百口銘曰永安隸書

夏州赫連勃勃以龍昇二年造五口刀背刀有龍雀環兼金鑲作一龍形長三尺九寸銘曰古之利器

楚湛盧大夏龍雀名冠神都可以懷遠可以柔邇如風靡草威服九區宋王劉裕破長安得此刀後入於

梁

吳將刀

周璠作南郡太守造一刀背上有盪寇將軍字八分書

蔣欽拜列郡司馬造一刀文曰司馬隸書

周幼平擊曹公勝拜平虜將軍因造一刀銘背曰幼平

董元成少果勇自打鐵作一刀後討黃祖於蒙衝河元成引刀斷衝頭爲二流拜大司馬號斷蒙刀

潘文拜偏將軍爲擒關羽拜固陵太守因造一刀銘曰固陵

朱理君少受征討黃武中累功拜安國將軍作一佩刀文曰安國

關羽爲先主所重不惜身命自採都山鐵爲二刀銘曰萬人及羽敗羽惜刀投之水中

張飛初拜新亭侯自命匠鍊赤朱山鐵爲一刀銘曰新亭侯蜀大將也後被范強殺強將此刀入於吳

諸葛亮定黔中從青石祠過遂抽刀刺山投刀不拔而去行人莫測

黃忠漢先主定南郡得一刀赤如血於漢中擊夏侯軍一日之中手刃百數

魏將刀

鍾會克蜀於成都土中得一刀文曰太一會死入帳下王伯昇伯昇後渡江刀遂飛入水

鄧艾年十二曾讀陳太丘碑碑下掘得一刀黑如漆長三尺餘刀上常有氣淒淒然時人以爲神物

董卓少時耕野得一刀無文字四面隱起作山雲文斷玉如泥及卓貴示五官郎將蔡邕邕曰此項羽之刀也

袁紹在黎陽夢有一神受一寶刀及覺果在臥所銘曰思召紹解之曰思召紹字也

郭維於太原得一刀文曰宜爲將後遂爲將軍及與蜀將戰敗失此刀

古今刀劍錄

八

王雙曾於市中買得一刀。賣人曰：得之者貴。因不見。雙後佩之。爲魏將。後與曹真一刀換也。

右陶宏景古今刀劍錄一卷。備載古帝王所鑄作刀劍。起夏后啓。訖梁武帝。其自序謂前王後帝。莫不鑄之。尚已。然其後又載有諸小國刀劍。並三國諸名將刀。則如春秋時。吳王闔閭。越王勾踐。所命劍工若干將。歐冶。鑄成龍淵。太阿。純鈎。湛盧。豈不足當諸小國名將。何以盡棄而不錄耶。抑以其詳見吳越春秋。越絕等書。故不復論列也。是錄固不免遺漏。而後之校刊是書者。復少詳審。如於蜀主劉備采金牛山鐵鑄八劍條下。引房子容云云。是記唐人說此劍事。應別爲一行。或用小字夾注。不合混入本文。又稱元當作蒲元。乃人姓名。諸葛武侯掾屬。藝文類聚載有蒲元傳。云性多奇思。爲諸葛亮鑄刀三千口。言漢水鈍弱。不任淬用。乃命人於成都取江水淬刀。因曰神刀。卽此故事。則此稱元爲蒲元之譌無疑也。後又脫去蜀將刀一行。茲因例從叢書原本重刻。不及改正。仍分別記此。俾學者得有所考焉。汝上王謨識。